



Komunikadu Imprensa 14 Agostu 2020

JSMP husu atu krime transnasionál, krime graves, krime violasaun hasoru fetu no labarik no krime korupsaun mantein la hetan Indultu no komutasaun ba pena

Indultu no komutasaun ba pena nu'udar direitu ida prizoneiru sira nian no normalmente iha kada loron boot sira Prezidente da Repúblika ezerse ninia kompeténsia tuir Konstituisaun da Republika¹ hodi fó indultu no komutasaun ba pena ba prizoneiru sira ne'ebé priense ona kriteria sira hanesan, kumpri ona metade husi pena ne'ebé hamonu ba nia, idade avansadu, iha komportamentu di'ak no razaun umanitariu hanesan moras ka seluk tan.

“JSMP rekoñese utilizasaun podér indultu nu'udar kompeténsia eksklusiva ne'ebé Konstituisaun RDTL fó ba Prezidente Repúblika no nu'udar direitu prerogativu Prezidente nian. Maski nune'e, JSMP husu atu krime transnasionál ka organizada, krime grave sira, krime violasaun hasoru fetu no labarik no krime korupsaun mantein la hetan Indultu no komutasaun ba pena tuir lei prosedimentu indultu no komutasaun ba pena,” dehan Diretora Ezekutiva JSMP, Sra. Ana Paula Marçal.

Iha tinan 2020 ne'e, Governu liuhusi Ministériu Justisa apresenta no rekomenda lista prizoneiru hamutuk na'in 184 ba Prezidente da Repúblika hodi bele fó indultu no komutasaun ba pena no iha komemorasaun restorasaun independénsia ba dala XVIII. Husi totál ne'e, iha Maiu 2020, bazeia ba dekretu Prezidente Nú. 41/2020, 28 Maiu, Prezidente da Repúblika Francisco Guterres Lu Olo fó indultu ba prizoneiru sira ne'ebé maioria ho pena tinan haat mai kraik. Husi totál ne'e prizoneiru na'in 17 hetan liberdade totál no prizoneiru na'in ida hetan indultu parsial, mezmu iha hela situasaun Estadu Emerjénsia. Enkuantu ba prizoneiru seluk Prezidente da Repúblika sei fó indultu iha loron boot sira tuir mai hanesan iha 30 Agostu tinan ida ne'e.

JSMP hanoin katak atu asegura no hametin konfiansa públiku nian ba iha sistema justisa, presiza tetu didi'ak ba prosesu indultu ka kualkér forma ne'ebé Prezidente utiliza tenke iha opsaun atu hamenus pena gradualmente, la'os hasai totál hosi prizaun hanesan prátika sira ne'ebé durante ne'e akontese.

¹ Artigu 85 Konstituisaun Republika kona-ba Kompeténsia rasik :
Prezidente-Repúblika de'it mak sei hala'o knaar hirak ne'e: pontu (i) Rona tuir Governu, atu fó perdaun ka hamenus kastigu.

Iha tinan sira ba kotuk, antes Lei prosedimentu indultu no komutasaun ba pena diskute no aprova, JSMP halo advokasia atu krime sira mensiona iha leten la bele hetan indultu. Iha momentu ne'ebá JSMP hasoru bankada sira iha Parlamentu Nasionál no deputadu sira ne'e konkorda atu Prezidente la fó indultu ba krime transnasionál, krime grave sira, krime violasaun hasoru feto no labarik no krime korupsaun. Tanba bainhira krime sira ne'e mak nafatin hetan indultu ne'e klaru sei fo imazen ladiak ba povu no estadu direitu demokrátiku.

Finalidade lei indultu promulga liuhusi *Lei Nú. 5/2016, 25 Maiu kona-ba Procedimento de concessão de Indultu e comutação de pena* no lei ne'e konsidera krime sira mensiona iha leten la hetan indultu (artigu 4 kona-ba *crimes insuscetíveis de indulto*)². JSMP hein katak iha 30 Agostu 2020, Prezidente sei foti desizaun tuir rekezitu sira iha lei refere.

Atu hetan informasaun kompletu bele kontaktu:

Ana Paula Marçal
Diretora Ezekutiva JSMP
Email: ana@jsmp.tl
Nú telefone: 3323883 | 77040735
info@jsmp.tl
Website: <http://jsmp.tl/>

² *Lei Nú. 5/2016, 25 Maiu, Procedimento de concessão de Indultu e comutação de pena, artigo 4 : Crimes insuscetíveis de indulto.*